

Սիրելի անդամներ ծխական ժողովի,

Հայաստանեայց Առաքելական Ս.Երրորդութիւն Եկեղեցւոյ տարեկան ծխական ժողովին, սիրով կ'ողջունենք ձեզ, յանուն Ամերիկահայ թեմի բարեխնամ Առաջնորդ Գերշ.Տ.Թորգոմ Ս.Արք.Մանուկեանի

Տարուէ տարի գումարուող ծխական ժողովները լաւագոյն առիթներն են իբրեւ զաւակներ Հայց.Առաք.Եկեղեցւոյ, վերանորոգելու մեր ուխտն ու նուիրումը եւ անխախտ պահելու մեր բարոյական կապը, Գանդէպ մեր մայր եկեղեցւոյ պայծառութեան եւ մեր հոգիներու փրկութեան համար:

Տարի մըն ալ ծառայեցինք ձեզի հետ, միասին աղօթեցինք, միասին գործեցինք համբերութեամբ, յարատեւութեամբ եւ մանաւանդ սիրով, նախ Աստուծոյ փառքին՝ եւ ապա մեր ժողովուրդին հոգեւոր երջանկութեան համար:

Այսօր տասնըհինգ տարիներէ ի վեր մեր իսկ անձնական գոհողութիւններով կանգնած եկեղեցին եւ յարակից սրահը քաղաքիս կեդրոնը, տեւական միխթարութեան եւ հոգեկան գոհունակութեան վայր մը դարձած է, մանաւանդ բոլոր անոնց համար, որոնք դեռ երէկ իրենց տունն ու տեղը, եկեղեցիներն ու դպրոցները, ինչպէս նաեւ զանազան կարգի կազմակերպութիւնները թողած եկան իրենց նոր բոյնը հաստատելու սա խաղաղ եւ ապահով ափերուն, իրենց կեանքի ապահովութեան եւ իրենց ընտանիքներու բարօրութեան համար:

Օրըստօրէ աճող եւ բազմապատկուող Թորոնթոնի հայ գաղութը այսօր աւելի եւս կարիքը ունի նոր հրամայականներու եւ ծրագրուած նոր որոշումներու գործադրութեանց, քարեղէն շէնքերէն զատ եւ վեր մեր հոգեկան շէնքերուն շինութեան, եւ մեր մէջ աւելի զօրացնելու մեր պարտականութիւններն ու պատասխանատուութեանց զգացումները, կարենալ անկորուստ պահելու համար մեզի յանձնուած սրբութիւններն ու աւանդութիւնները: Այն ատեն միայն մենք ոչ թէ միայն նիւթական նուաճումներով պիտի մտահոգուինք, այլ հոգեւոր եւ բարոյական նուաճումներով աւելի եւս հարստացած, պիտի պայծառանանք ու բարգաւաճինք, մեզի հետ հարստացնելով նաեւ հոգիներն ու զգացումները մեր զաւակներուն, անոնց տալով տեւական հպարտութիւնը հայ անունին եւ հայ արժէքներու գիտակցութեան:

Այս կապակցութեամբ կ'ուզէինք ըսել թէ մեզի համար հոգեկան միխթարութիւն եղած է մեր եօթնամեայ պաշտօնավարութեան ընթացքին տեսնել կարգ մը ծնողներ, որոնք ոչ մէկ ջանք կը խնայեն իրենց զաւակներուն տալու հոգեւոր եւ ազգային առողջ դաստիարակութիւն եւ արթուն գիտակցութիւն հայ հոգիին ու հայկական արժէքներու:

Իցիւ թէ մեր բոլոր ծնողներն ալ ունենային այսօրինակ նախանձանդութիւն եւ յարատեւութիւն, որովհետեւ միայն այս կերպով պիտի կարենանք փրկել մեր ազգի մնացորդացը համայնակուլ եւ օտարամուլ հոսանքէն: Ջանանք փրկել մեր լաւագոյն ամբողջը, հաւաքական գիտակցութեամբ իբրեւ Աստուծոյ հոգեւոր ընտանիքը միասնաբար եւ համագործակցաբար ապրելով ու գործելով սիրոյ ու խաղաղութեան մթնոլորտի մը մէջ:

Գանատայի հայոց Առաջնորդական փոխանորդ Գերշ.Տ.Վաչէ Ս.Ծպիսկոպոս Յովսէփեան անցնող տարուան ընթացքին բազմաթիւ առիթներով եղաւ մեզի հետ եւ շնորհիւ իր ջանքին, գոհողութեան եւ խաղաղ կազմակերպչական աշխատանքներուն, համերաշխ եւ ներդաշնակ տարի մը բոլորեցինք ի միխթարութիւն բոլորիս:

Մեր սրտագին երախտագիտութիւնները կը յայտնենք նորին Սրբազնութեան որ շատ առիթներով մեզ փոխարինեց, խանդավառութիւն բերելով մեր կրօնական եւ ազգային զգացումներուն, նախազանգելով նաեւ մեր ծխական խորհուրդի շատ մը նիստերուն:

Այս հանդիսաւոր առիթով որպէս հոգեւոր հովիւը այս եկեղեցւոյ, սրտի քաղցր պարտականութիւն կը նկատենք մեր գնահատանքը ուղղելու եկեղեցւոյս պատուարժան ծխական խորհուրդին, որ համբերութեամբ, յարատեւութեամբ եւ նուիրումով յաղթահարեց շատ մը դժուարութիւններ պահելու համար մեր եկեղեցւոյ ներքին ներդաշնակութիւնն ու խղաղութիւնը: Այս առիթով որպէս կարեւոր նուաճում հոգ պէտք է յիշել այն որ այս տարի կարելի եղաւ վրահի շինութեան մեր յետնեալ պարտքերը վճարել եւ այդ մտահոգութենէն ձեռքազատիլ: Մեր հայրական օրհնութիւնները կ'երկարենք պատուարժան ծխական խորհուրդի մէջ մի անդամին, ինչպէս նաեւ եկեղեցւոյս օժանդակ բոլոր յանձնախումբերուն եւ կազմակերպութեանց: Հոս աւելորդ կը նկատենք անդրադառնալ իւրաքանչիւրին գործունէութեան, քանի որ իւրաքանչիւրին առիթ պիտի տրուի այստեղ: Սակայն կ'ուզենք հոս անպայման յիշած ըլլալ, եւ մեր գնահատանքին հետ սրտագին շնորհակալութիւն յայտնել այն ազնիւ երիտասարդներուն եւ երիտասարդուհիներուն, որոնք ամէն կիրակի կու գան եկեղեցի անձնագրութեամբ եւ իրենց գեղեցիկ ձայները ի սպաս կը դնեն եկեղեցւոյս սրբազան երգեցողութեան ներդաշնակութեան ի խնդիր, այդ ազնիւ ու հաւատացեալ խումբը գլխաւորուած է եկեղեցւոյս Դպրաց Դասու Միութեամբ, ղպրապետութեամբ Պր.Միկայս Սէլեանի, վարչութեան ատենապետ Պր.Վարդան Վարդանեանով, երգեհոնահարներ Տիկ.Արաքսի Գասարճեան եւ Պր.Շտուար Լուքայով ինչպէս նաեւ Ս.Սեղանի սպասարկող Ուրարակիր ղպիրներով:

Թող փառաց Տէրը ինք վարձատրէ բոլորիս նուիրումն ու ծառայութիւնները, եւ ուղղէ մեր ձեռքերուն գործերը, եւ մեր ձեռքերուն գործերը յաջողութեամբ պսակէ. ամէն:

Յաջողութեան լաւագոյն մաղթանքներով մնամ

Սիրոյ ողջոյնիւ եւ օրհնութեամբ

Աղօթարար

Ժիրայր Վրդ. Թաշճեան

Թորոյթօ

Յունկրւար 20, 1969